



საქართველოს პარლამენტის თავმჯდომარე

თბილისი 0118, რუსთაველის გამზირი № 8, საქართველოს პარლამენტის სასახლე

ბ რ ძ ა ნ ე ბ ა

1/137/26

08-06-2026

„საქართველოს პარლამენტში მასობრივი ინფორმაციის საშუალებათა წარმომადგენლების აკრედიტაციის წესის დამტკიცების თაობაზე“ საქართველოს პარლამენტის თავმჯდომარის 2023 წლის 6 თებერვლის №1/31/23 ბრძანებით დამტკიცებულ „საქართველოს პარლამენტში მასობრივი ინფორმაციის საშუალებათა წარმომადგენლების აკრედიტაციის წესში“ ცვლილებების შეტანის შესახებ

საქართველოს ზოგადი ადმინისტრაციული კოდექსის 63-ე მუხლისა და საქართველოს პარლამენტის რეგლამენტის 21-ე მუხლის მე-2 პუნქტის „ლ“ და „უ“ ქვეპუნქტების შესაბამისად:

1. „საქართველოს პარლამენტში მასობრივი ინფორმაციის საშუალებათა წარმომადგენლების აკრედიტაციის წესის დამტკიცების თაობაზე“ საქართველოს პარლამენტის თავმჯდომარის 2023 წლის 6 თებერვლის №1/31/23 ბრძანების პირველი პუნქტით დამტკიცებული „საქართველოს პარლამენტში მასობრივი ინფორმაციის საშუალებათა წარმომადგენლების აკრედიტაციის წესის“:

ა) მე-2 მუხლის მე-2 პუნქტი ჩამოყალიბდეს შემდეგი რედაქციით:

„2. საპარლამენტო ჟურნალისტის აკრედიტაცია გაიცემა საქართველოში რეგისტრირებული მასობრივი ინფორმაციის საშუალების (შემდგომ – მედიასაშუალება) ჟურნალისტზე 1 წლის ვადით, ყოველი კალენდარული წლისთვის და მოქმედებს კალენდარული წლის 1 იანვრიდან 31 დეკემბრის ჩათვლით, გარდა ამ წესის მე-3 მუხლის მე-3 პუნქტით გათვალისწინებული შემთხვევისა.“;

ბ) მე-3 მუხლი ჩამოყალიბდეს შემდეგი რედაქციით:

„მუხლი 3. საპარლამენტო ჟურნალისტის აკრედიტაციის მიღების თაობაზე განაცხადის მიღება

1. ამ წესის №1 დანართით გათვალისწინებული ფორმის დაცვით საქართველოს პარლამენტის თავმჯდომარის სახელზე შევსებული საპარლამენტო ჟურნალისტის აკრედიტაციის მიღების თაობაზე განაცხადი მიიღება სააკრედიტაციო წლის წინა წლის 1 დეკემბრიდან 15 დეკემბრის ჩათვლით. თუ განაცხადების მიღების ბოლო დღე ემთხვევა საქართველოს კანონმდებლობით

დადგენილ უქმე დღეს, განაცხადების მიღება დასრულდება მომდევნო სამუშაო დღის ბოლოს.

2. ამ მუხლის პირველი პუნქტით გათვალისწინებული საპარლამენტო ჟურნალისტიკის აკრედიტაციის მიღების თაობაზე განაცხადის წარდგენის ვადები არ ვრცელდება იმ მედიასაშუალებაზე, რომელსაც ამ წესის მე-11 მუხლის მე-2 პუნქტის საფუძველზე აკრედიტაცია ვადამდე გაუუქმდა და განსაზღვრული ვადით შეეზღუდა საპარლამენტო ჟურნალისტიკის აკრედიტაციის მიღების თაობაზე განაცხადის წარდგენის უფლება. აღნიშნული შეზღუდვის ვადის გასვლის შემდეგ ეს მედიასაშუალება უფლებამოსილია საპარლამენტო ჟურნალისტიკის აკრედიტაციის მიღების თაობაზე განაცხადით საქართველოს პარლამენტის თავმჯდომარეს მიმართოს ნებისმიერ დროს, მაგრამ არაუგვიანეს სააკრედიტაციო წლის 1 ნოემბრისა.

3. ამ მუხლის მე-2 პუნქტით გათვალისწინებულ შემთხვევაში საქართველოს პარლამენტის აპარატი (შემდგომ – აპარატი) საპარლამენტო ჟურნალისტიკის აკრედიტაციის მიღების თაობაზე განაცხადს მიღებიდან 10 სამუშაო დღის ვადაში განიხილავს და იღებს შესაბამის გადაწყვეტილებას. საპარლამენტო ჟურნალისტიკის აკრედიტაციის გაცემის შესახებ გადაწყვეტილების მიღების შემთხვევაში საპარლამენტო ჟურნალისტიკის აკრედიტაცია გაიცემა სააკრედიტაციო წლის დარჩენილი ვადით.

4. საპარლამენტო ჟურნალისტიკის აკრედიტაციის მისაღებად მედიასაშუალებამ შეიძლება წარადგინოს მხოლოდ ის ჟურნალისტი, რომელიც ამ მედიასაშუალებაში ანაზღაურებად საქმიანობას ახორციელებს.“;

გ) მე-4 მუხლის მე-4 პუნქტი ჩამოყალიბდეს შემდეგი რედაქციით:

„4. თუ წარდგენილი საპარლამენტო ჟურნალისტიკის აკრედიტაციის მიღების თაობაზე განაცხადი არ შეესაბამება ამ მუხლის პირველი და მე-2 პუნქტების მოთხოვნებს, აკრედიტაციის მაძიებელს აპარატის მითითებით ეძლევა 3 სამუშაო დღე ხარვეზის გამოსასწორებლად.“;

დ) მე-5 მუხლის პირველი და მე-2 პუნქტები ჩამოყალიბდეს შემდეგი რედაქციით:

„1. აპარატის უფროსი არაუგვიანეს სააკრედიტაციო წლის წინა წლის 25 დეკემბრისა (გარდა ამ წესის მე-3 მუხლის მე-3 პუნქტით გათვალისწინებული შემთხვევისა) საქართველოს პარლამენტის თავმჯდომარის თანხმობით იღებს გადაწყვეტილებას საპარლამენტო ჟურნალისტიკის აკრედიტაციის გაცემის შესახებ ან მის გაცემაზე უარის თქმის თაობაზე. საპარლამენტო ჟურნალისტიკის აკრედიტაცია გაიცემა მხოლოდ იმ შემთხვევაში, თუ აკრედიტაციის მაძიებელი აკმაყოფილებს აკრედიტაციის მისაღებად ამ წესით დადგენილ ყველა მოთხოვნას.

2. საპარლამენტო ჟურნალისტიკის აკრედიტაციის გაცემაზე უარი შეიძლება ითქვას, თუ აკრედიტებულ მედიასაშუალებას ადრე ვადამდე გაუქმებული ჰქონდა აკრედიტაცია ამ წესის მე-11 მუხლის პირველი პუნქტის „გ“ ან „დ“ ქვეპუნქტის ან მე-2 პუნქტის შესაბამისად. ამასთანავე, თუ მედიასაშუალების მიერ წარდგენილი ჟურნალისტების სიაში მყოფი რომელიმე ჟურნალისტიკის მიმართ საქართველოს კანონმდებლობის შესაბამისად მიღებულია საქართველოს პარლამენტის სასახლეში შესვლის შეზღუდვის თაობაზე გადაწყვეტილება, ამ ჟურნალისტზე საპარლამენტო ჟურნალისტიკის აკრედიტაცია არ გაიცემა, მიუხედავად იმისა,

გასაჩივრებელია თუ არა აღნიშნული გადაწყვეტილება. აპარატი საპარლამენტო ჟურნალისტის აკრედიტაციის გაცემაზე უარის თქმის შესახებ აკრედიტაციის მაძიებელს ატყობინებს შესაბამისი გადაწყვეტილების მიღებიდან 3 სამუშაო დღის ვადაში.“;

ე) მე-9 მუხლის მე-2 პუნქტი ჩამოყალიბდეს შემდეგი რედაქციით:

„2. მედიასაშუალება საპარლამენტო ჟურნალისტის აკრედიტაციის მიღების თაობაზე განაცხადს წარადგენს ამ წესის მე-3 მუხლის მე-4 პუნქტითა და მე-4 მუხლით დადგენილი წესების შესაბამისად.“;

ვ) მე-11 და მე-12 მუხლები ჩამოყალიბდეს შემდეგი რედაქციით:

„მუხლი 11. აკრედიტებული მედიასაშუალების აკრედიტაციის ვადამდე გაუქმება, მედიასაშუალებისთვის ამ წესით გათვალისწინებული აკრედიტაციების მიღების თაობაზე საქართველოს პარლამენტის თავმჯდომარისადმი მიმართვის უფლების შეზღუდვა

1. იმ მედიასაშუალების აკრედიტაცია, რომლის ჟურნალისტებსაც აქვთ საპარლამენტო ჟურნალისტის აკრედიტაცია, აპარატის უფროსის გადაწყვეტილებით ვადამდე გაუქმდება:

ა) აკრედიტებული მედიასაშუალების განცხადების საფუძველზე;

ბ) აკრედიტებული მედიასაშუალების საქმიანობის კანონით დადგენილი წესით შეჩერების ან შეწყვეტის შემთხვევაში;

გ) თუ დადგინდა, რომ აკრედიტებულმა მედიასაშუალებამ ამ წესის მე-4 მუხლით გათვალისწინებული დოკუმენტაცია/ინფორმაცია განზრახ არასწორად წარადგინა;

დ) თუ საქართველოს პარლამენტის მორიგი სესიის პერიოდში ზედიზედ 10 კვირის განმავლობაში პარლამენტის სასახლეში აკრედიტებული მედიასაშუალების არცერთი აკრედიტებული ჟურნალისტი არ იმყოფებოდა;

ე) თუ აკრედიტებული მედიასაშუალების საქმიანობა აღარ უკავშირდება საქართველოს პარლამენტის საქმიანობის გაშუქებას.

2. აკრედიტებული ჟურნალისტის მიერ ამ წესის მე-14 ან მე-15 მუხლით დადგენილი წესების დარღვევის განმეორებისა და დარღვევის სიმძიმის გათვალისწინებით, შესაძლებელია შესაბამის მედიასაშუალებას ვადამდე გაუქმდეს აკრედიტაცია და არაუმეტეს 1 წლის ვადით შეეზღუდოს ამავე წესით გათვალისწინებული აკრედიტაციების მიღების თაობაზე საქართველოს პარლამენტის თავმჯდომარისადმი მიმართვის უფლება. ამასთანავე, იმ მედიასაშუალებას, რომელიც არ არის აკრედიტებული მედიასაშუალება, მისი ჟურნალისტის მიერ ამ წესის მე-14 ან მე-15 მუხლით დადგენილი წესების დარღვევის განმეორებისა და დარღვევის სიმძიმის გათვალისწინებით, არაუმეტეს 1 წლის ვადით შეიძლება შეეზღუდოს ამ წესით გათვალისწინებული აკრედიტაციების მიღების თაობაზე საქართველოს პარლამენტის თავმჯდომარისადმი მიმართვის უფლება.

მუხლი 12. აკრედიტებული ჟურნალისტის აკრედიტაციის ვადამდე გაუქმება, ჟურნალისტისთვის ამ წესით გათვალისწინებული აკრედიტაციების გაცემის თაობაზე საქართველოს პარლამენტის თავმჯდომარისადმი მიმართვის უფლების შეზღუდვა

1. აკრედიტებული ჟურნალისტის აკრედიტაცია აპარატის უფროსის გადაწყვეტილებით ვადამდე გაუქმდება, თუ:

ა) აკრედიტებულ ჟურნალისტს, მის მიერ ამ წესის მე-14 ან მე-15 მუხლით დადგენილი წესების დარღვევის განმეორებისა და მისი სიმძიმის გათვალისწინებით, აკრედიტაცია ვადამდე გაუქმდება და შესაბამის მედიასაშუალებას არაუმეტეს 1 წლის ვადით შეეზღუდება აღნიშნული ჟურნალისტის საპარლამენტო ჟურნალისტის აკრედიტაციის მისაღებად წარდგენილი ჟურნალისტების სიაში შეყვანის უფლება. ამასთანავე, იმ მედიასაშუალებას, რომელიც არ არის აკრედიტებული მედიასაშუალება, არაუმეტეს 1 წლის ვადით შეეზღუდება ამ ჟურნალისტისთვის ერთჯერადი სპეციალური აკრედიტაციის გაცემის თაობაზე განაცხადით საქართველოს პარლამენტის თავმჯდომარისადმი მიმართვის უფლება;

ბ) აკრედიტებული მედიასაშუალების აკრედიტაცია გაუქმდა;

გ) ჟურნალისტის აკრედიტაციის გაუქმება აკრედიტებული მედიასაშუალების ხელმძღვანელმა მოითხოვა;

დ) ჟურნალისტს აკრედიტებულ მედიასაშუალებაში საქმიანობა შეწყვეტილი აქვს;

ე) ჟურნალისტმა სააკრედიტაციო მოწმობა სხვა პირს გადასცა.

2. ამ მუხლის პირველი პუნქტის „გ“ ან „დ“ ქვეპუნქტით გათვალისწინებული პირობის დადგომისას აკრედიტებული მედიასაშუალება უფლებამოსილია მოითხოვოს ამ წესის მე-6 მუხლით განსაზღვრული კვოტების ფარგლებში სხვა საპარლამენტო ჟურნალისტის აკრედიტება. ამ მოთხოვნას განიხილავს და გადაწყვეტილებას იღებს აპარატის უფროსი.“;

ზ) მე-13 მუხლის პირველი და მე-2 პუნქტები ჩამოყალიბდეს შემდეგი რედაქციით:

„1. თუ საპარლამენტო ჟურნალისტმა დაარღვია ამ წესის მე-14 ან მე-15 მუხლით დადგენილი წესები, მას აპარატის უფროსის გადაწყვეტილებით შეიძლება შეუჩერდეს აკრედიტაცია 1 თვით.

2. სპეციალური აკრედიტაციის მქონე ჟურნალისტის მიერ ამ წესის მე-14 ან მე-15 მუხლით დადგენილი წესების დარღვევის შემთხვევაში აპარატის უფროსის გადაწყვეტილებით შეიძლება შეიზღუდოს მასზე აკრედიტაციის გაცემა 1 თვით, ხოლო დარღვევის განმეორების შემთხვევაში – არაუმეტეს 1 წლის ვადით.“;

თ) მე-15 მუხლის მე-2 პუნქტი ჩამოყალიბდეს შემდეგი რედაქციით:

„2. აკრედიტებული ჟურნალისტი ვალდებულია:

ა) სათანადო პატივისცემა გამოიჩინოს საქართველოს პარლამენტის სასახლეში მყოფი ყველა პირის ღირსებისა და პირადი სივრცის მიმართ, აგრეთვე გაუფრთხილდეს პარლამენტის ქონებას;

ბ) ხელი არ შეუშალოს საქართველოს პარლამენტში მიმდინარე ღონისძიების მსვლელობას;

გ) საქართველოს პარლამენტის წევრის ან აპარატის თანამშრომლის წინასწარი ნებართვის გარეშე არ გადაიღოს მისი სამუშაო ოთახი;

დ) საქართველოს პარლამენტის წევრის, აპარატის თანამშრომლის ან პარლამენტში სტუმრად მყოფი პირის მიერ ინტერვიუს ჩაწერაზე უარის თქმის შემთხვევაში შეწყვიტოს ინტერვიუ;

ე) საქართველოს პარლამენტის წევრის, აპარატის თანამშრომლის ან პარლამენტში სტუმრად მყოფი პირის თანხმობის გარეშე არ გადაიღოს მისი დოკუმენტი, მისი ტელეფონის ან სხვა ელექტრონული მოწყობილობის ეკრანი ისე, რომ მასზე არსებული ინფორმაციის ან გამოსახულების აღქმა შესაძლებელი იყოს;

ვ) დაემორჩილოს დაცვის თანამშრომლისა და აპარატის მანდატურის სამსახურის მანდატურის კანონიერ მითითებებს;

ზ) სააკრედიტაციო მოწმობა არ გადასცეს სხვა პირს;

თ) სააკრედიტაციო მოწმობა ატაროს გამოსაჩენ ადგილზე.“.

2. ბრძანება ძალაში შედის კანონით დადგენილი წესით საჯაროდ გამოცხადების დღიდან.

3. ბრძანება შეიძლება გასაჩივრდეს კანონით დადგენილი წესით საჯაროდ გამოცხადების დღიდან 1 თვის ვადაში თბილისის საქალაქო სასამართლოში (მისამართი: ქალაქი თბილისი, დავით აღმაშენებლის ხეივანი №64).

პარლამენტის თავმჯდომარე
შალვა პაპუაშვილი

